

四庫全書

史部

欽定四庫全書

皇朝文獻通考卷四十六

國用考

八

賑卹

賑濟

順治二年初定八旗賑濟例八旗墾地每六畝給米二石王貝勒貝子公府屬人役給米如之其投充人帶來地不准給口外八旗蒙古地按口名折

給米銀許其沿邊糴米毋令進口八旗游牧地每
口月給米一斗張家口者給米古北口者給銀
五年定直省駐防官應給漕地米隨家口所在支給
六年傳八旗踏勘災地遇災王以下食俸官以上
每歲照俸米倍給

是年定歲災荒督撫即詳察頃畝分數具奏
八年山東江浙水以倉穀賑窮民以學租賑貧士
十年賑八旗貧人滿洲蒙古每佐領下給布六十

匹棉六百斤米百石漢軍每佐領下給布三十匹
棉三百斤米五十石

是年定凡勘災京城內外由戶部直省由督撫勘
奏請賑十六年定直省勘災用道府府倅康熙四
年定勘八旗災地用驍騎校領催勘明結送戶部
具題又定旗人七歲以上為一口六歲以下四歲
以上為半口其投充及傭雇人勿與

十一年分賑八旗人勞地每佐領下滿洲蒙古給

食米二百石漢軍百石管旗都統即以到通漕米
酌量散給旱地每六畝給米二斛米折各半折色
視時直守南苑海戶災地不論旱澇每六畝給米
一斛又發戶禮兵工部庫貯銀十六萬并

內帑銀八萬兩分賑直隸各府饑民

十二年發

內帑銀二萬兩賑八旗窮民

十三年賑給八旗滿洲蒙古每佐領米三百石漢

軍米百石官員家人充兵者不與賑八旗被災地
每六畝米一斛又發

內帑銀三萬兩賑直隸饑民

十四年發

內帑銀十萬兩分賞八旗兵丁及賑直隸饑民

十六年雲南貴州新入版圖發銀十五萬兩賑濟
窮民

十七年定奏報期限直省災傷先以情形入奏夏

災限六月秋災限七月州縣遲報逾一月內者罰俸六月一月外者降一級二月外者二級均調用三月外者革職撫司道官以州縣報到日起限逾限議亦如之康熙七年定八旗報災不得過八月十日雍正六年增定勘報之官寬限十日奏報之官寬限五日統以四十五日為限乾隆二年定凡遇水旱督撫既入奏即親至災所率屬發倉廩先賑仍於四十五日限內題明加賑賑畢冊具戶口

米糧各數題銷其被災頃畝分數於勘奏之日隨
疏聲明應蠲免數目於勘奏日始限兩月冊報七
年定甘肅地氣節候較異他省鞏昌蘭州寧夏西
寧甘州涼州六府肅州及安西靖逆二廳如夏秋
二禾於六九月災者仍舊限申報或有限後災者
準於七十月望前申報

康熙元年定八旗被水災地每六畝給米二斛蝗
電災每六畝給一斛

三年八旗莊田災賑米粟共二百十三萬六千斛
有奇

七年六月山東地震賑災民

九年

命大臣往勘淮揚水災明年又遣大臣同江南督撫截留
漕米並鳳徐各倉米賑濟災民人給米五斗六歲
以上十歲以下半之又分設米廠食餓者人日給
米一升三日一散部差司官每府一人同地方官

驗給

是年賑湖廣竹山縣被火災民

十年八旗屯地旱賑米百六十四萬七百石

十二年山西饑發銀二十萬兩

命部員往會賑

十八年賑山東沂州等十三州縣饑民

是年七月

京師地震發帑十萬以賑旗民

二十四年浩齊特郡王以所屬蒙古饑請賑從之
遣官運拜察儲粟千石往賑

二十五年

特遣大臣往賑鳳陽徐州屬災民

二十七年雲南鶴慶府劍川州地震死者每名給
銀一兩傷者半之屋壞者每間銀二兩無棲止者
人給穀一石幼者半之

二十八年

諭撥戶部庫銀三十萬兩賑直隸饑民

三十年陝西西安二十七州縣災撥山西銀二十萬兩赴陝充賑

命大臣一人往驗每大口日給米三合小口一合五勺折價視時直至明年四月終停賑

是年賑直隸十四州縣災民每大口日給米四合小口二合

三十三年賑直隸十一州縣災民大口日給米三

合小口一合五勺自二月至明年四月止

三十四年山西平陽府地震

命大臣一人往賑卹死大口給銀二兩小口七錢五分葺

居戶給銀一兩

三十六年

諭直省被災地方著差戶部賢能司官一人會同該撫等
逐一親行確勘具奏

三十七年山東濟兗東三府屬比歲不登

諭衆賢能司官二人往會巡撫同散賑

三十九年發坡賴村倉糧賑巴林二旗窮丁

四十年賑甘肅河州屬土司准內地每大口月給米一倉斗小口半之

四十二年山東饑

上命戶部官馳驛速往截留漕運尾船米五十萬石備用
並委八旗官各支庫銀三千兩前往山東會同地方官賑濟

諭曰賑濟山東饑民事關緊要應分為三路每路差大臣一人與先差往司官一同往返巡察於事有益截漕糧亦屬緊要漕運總督見今無事若作速前來觀看截留其賑濟饑民官員所領雖係公項若勉自効有益於民事竣回時一併議叙

是年賑安徽鳳陽屬亳州等州縣饑民大口日給五合小口三合

四十三年湖廣監利縣災每大口日給穀一升小

口六合自十一月至明年二月止

四十六年

諭倉穀數少未足徧給惟各州縣截留漕米可以實惠及民目下時已屆冬總漕無事著會同總督巡撫親往各州縣被災地方備加察勘將本年所徵漕糧每州縣或留八九萬石或留十萬石酌量足支賑給之數分別多寡存留支散及今漕米尚未開兌截見收之糧以濟待哺之衆實於民生大有裨益此朕殷殷懷保赤子矜念

如傷之至意戶部即移文該督撫等實心奉行仍開具賑濟實數奏聞

時以淮徐揚三府無存穀用司庫銀十萬兩充賑大口月給銀三錢小口半之

四十九年福建漳州泉州旱令截留今冬應運鎮江漕十萬石運至狼山截留松江湖州漕各十萬石運至乍浦令福建總督遣總兵官二人用戰船至狼山乍浦接運至二郡以賑饑民

五十二年賑四川茂州及平番等營堡地震災民
五十三年以甘肅去歲薄收民艱食

命大臣一人巡察兼行賑濟自二月至六月每大口日給
米三合小口二合

五十四年蒙古被雪損傷牲畜運穀賑烏喇特十
四旗察哈爾八旗乏食人

五十五年順天永平府屬米價翔貴撥京通倉米
二十萬石令部院官往賑

五十七年索倫被水發銀一萬兩遣副都統等往會黑龍江將軍酌量賑濟

是年發

盛京倉賑扎賚特固山貝子特固斯屬下窮丁

五十九年陝西饑戶部撥運銀五十萬兩差大臣率部院官分西安延安蘭州三路賑濟並將陝屬常平倉糧六十九萬二千石甘屬常平倉糧六十七萬二千石充賑旗人有情愿効力者許自備銀

米赴部具呈將職名送散賑官處俟効力事竣照銀米之多寡覈明議叙

是年直隸延慶保安懷來河城宣化龍門地震

命大臣一人往賑

六十年

諭今春雨澤甚少備荒要緊著發帑金五十萬兩差大臣往山陝地方買米賑濟

六十一年

特遣大臣賑直隸贊皇等四十二州縣饑民並發米各州

縣煮粥賑濟

雍正元年直隸河南山東災各遣大臣一人往賑
直隸河南則發倉穀及截留漕米充賑山東出司
庫銀十三萬四千兩散給其耕種無資者量助流
亡者令三省督撫招輯復業

是年郭爾羅斯喀爾沁扎魯特各旗饑發帑七萬
兩

命大臣往賑

二年發帑二萬兩賑蘇尼特四旗人

三年直隸饑截留漕米二十萬石發通倉米十萬石賑霸州七十二州縣民三月賑大興等四縣民一月又

諭今歲直隸地方被水小民乏食恐停賑之後正值東作之時農民謀食無策著再加賑一月

是年江南睢寧宿遷二縣水災用積穀煮賑五月

四年安徽所屬水無為望江等州縣煮賑五月泗
州

諭令布政使親勘用銀二萬兩按戶散給

五年直隸還鄉河決玉田縣堤遣大臣御史賫銀
二萬兩分視被災二十三州縣逐戶計口勘察散
賑

是年江南浙江湖北湖南間被水災各發帑飭大
吏酌量賑濟

六年定賑濟例勘災給糧有司官必親臨毋假手胥役里甲近城之地設粥廠遠在四鄉於二十里內各設一米廠照煮賑米數按口月給一次至七年增定賑濟畢將賑過銀米數目戶口姓名月日刊示曉諭以杜胥吏中飽

八年北河溢直隸順德廣平大名河間四府災遣侍郎副都統科道翰林等分四路每路各領帑銀二萬兩前往勘察仍動留漕改穀及捐穀散賑三

月復遣大臣往撫綏安輯毋令遷徙失所又河溢山東江南賑濱河州縣饑民並給銀以葺廬舍之水毀者

是年

京師地震發帑二萬兩遣官分五路勘賑每旗各賞銀三萬兩按名分給

十一年江南海溢常熟華亭等二十九州縣災直隸豐潤薊州等處亦被水咸如例賑卹

是年賑科爾沁窮丁六千六百餘名

乾隆元年

諭地方偶有水旱之事凡察勘戶口造具冊籍勢不得
不經胥役里保之手其所需飯食舟車紙張等費朕
聞竟有派累民間並且有取給於被災之戶口者若
遇公明之有司尚知稽察禁約至昏憤庸懦者則置
若罔聞益滋閭閻之擾矣嗣後凡飯食盤費及造冊
紙張各費皆酌量動用存公銀毋許絲毫派累地方若

州縣官不能詳察嚴禁以致胥役里保仍蹈故轍者著該督撫立即題叅從重議處

是年巴林四旗旱發帑萬兩遣官往賑

三年

諭各省學田銀糧原為散給各學廩生貧生之用但為數無多地方偶遇歉年貧生不能自給往往不免饑餒深可憫念朕思士子身列膠庠自不便令有司與貧民一例散賑嗣後凡遇地方賑貸之時著該督撫

學政飭令教官將貧生等名籍開送地方官覈實詳報視人數多寡即於存公項內量發銀米移交本學教官均勻散給資其饘粥如教官開報不實給散不均及為吏胥中飽者交督撫學政稽察即以不職叅治至各省學租務須通融散給極貧次貧生員俾霑實惠

是年寧夏地震壞廨署廬舍人民文武官亦間有遇災者

命大臣一人馳驛往視發司庫銀二十萬兩逐戶散賑
其遇災身故官弁照巡洋被風身故例

恩賜卹典又安徽旱天津水咸賑如例

是年定民間火災准動存公銀酌賑

四年賑江南貧民極貧賑四月次貧賑三月又次
貧賑一月旋

命下江極貧加賑一月上江州縣被災五分以上者極
貧次貧加賑一月被災四分以下者極貧加一月

是年定賑濟米數向例每名日支三四合至七八合不等嗣後大口日給米五合小口二合五勺凡遇賑有司官將被災分數賑卹款目豫期宣示以曉愚民如有奸民藉端要挾者論如法

六年安徽水賑鳳陽潁州饑民

七年黃淮交漲淹民田廬江淮饑

上心憂勞命大臣往會督撫勘賑用帑千餘萬破格拯濟民以蘇息時據奏報實數江蘇所屬江浦等二

十九州縣衛撫卹正賑加賑給被災軍民米共一百五十六萬二千六百三十五石銀共五百五萬一千五百二十一兩有奇沛縣護城隄決漂沒貧民賑糧共補給小麥七百四十三石七斗又賑貧生米二千八百三十四石銀四萬三千六百九十兩各有奇安徽所屬鳳陽等二十四州縣撫卹正賑加賑共給軍民貧生米八十三萬一千九百八十石九斗銀二百三十三萬四千零四十五兩

八錢四分各有奇又宿州等州縣收養無依貧民
米十有九石九斗五升銀一百有四兩七錢各有
奇

是年定地方凡遇水旱即行撫卹先賑一月再察
明戶口被災六分者極貧加賑一月被災七八分
者極貧加賑兩月次貧加賑一月被災九分者極
貧加賑三月次貧加賑兩月被災十分者極貧加
賑四月次貧加賑三月又定若地方積歉抑或災

出非常許將極貧加賑自五六月至七八月次賑
加賑自三四月至五六月又定山西湖廣貴州不
分極貧次貧山東陝西祇分極貧次貧皆按月給
賑江南浙江原分極貧次貧又次貧凡被災待賑
每至數千戶分為極貧次貧易於察驗至又次貧
與次貧相去無幾不便酌減賑卹且分晰多端未
免耽延滋擾應祇分為極貧次貧其又次貧宜從
刪省又定凡遇夏災其災地歲不兩熟及雖兩熟

而秋禾不復可種者照秋災例請賑風災如雹災
得貸種食傷大田者亦以秋災論

八年

諭上年江南淮徐鳳潁等府遭值水災朕宵旰焦勞無
一時釋於懷抱特遣大臣會同督撫百計經理不惜
千萬帑金期登斯民於衽席頃據陸續奏報被水之
地漸次涸出冬間可以種麥石林決口亦已堵禦水
勢減落朕心稍慰但念兩江受水之地甚廣其見在

已經涸出者民間努力耕種自不待言其沮洳將涸者開春布種春麥大麥及雜糧之屬亦可冀望有收惟是最窪之地積水較深有非人力所能計日宣洩者倘春月不能趕種春麥雜糧而停賑之期已屆窮民何以為生朕思慮及此深為憫惻著欽差大臣及該督撫將實在不能涸出補種之地一一察勘所有饑民口數若干按其情形酌定月分接續賑卹毋使失所

是年賑直隸天津河間深州屬二十八州縣山東德州等十三州縣饑民

九年安徽徽州寧國二屬浙江紹興嚴州衢州三屬間被水咸賑如例以徽屬產米少許折給浙三屬積水不涸加賑一月

十年直隸宣化府順天之延慶縣山西大同府江蘇安徽所治州縣間以災告咸賑如例各

諭加賑有差又為延慶民給牛種營井樹俾得耕種江

南之安東則戶給銀以葺其居

十一年山東河南江蘇安徽均被水江南為甚截漕米二十萬石充賑並給銀葺居以安棲止餘並於常賑外加賑有差

是年廣東廣州肇慶韶州南雄水例給口糧宣化府電均飭大吏如例賑卹

十二年山東大水九十州縣衛災截留山東河南漕並運天津北倉米充賑時據奏實數賑濟饑民

共穀四十四萬七千六百八十二石八斗米五十
九萬八千六百十有一石二斗銀一百七十九萬
三千六百四十九兩八錢各有奇賑濟老弱殘病
貧民銀七萬八百七十四兩六錢八分

是年江蘇颶風海溢崇明寶山上海鎮洋常熟昭
文南匯江陰沿江海各縣災

上軫其艱

諭令兵民並賑又直隸天津浙江杭州江南徐州間遇

偏災咸賑如例

十三年春

駕幸山東

軫念災黎令加賑外再加展賑江南亦如之秋山東鄒平等二十州縣衛又被水

諭各省督撫酌運倉穀助賑

是年西安福建旱

諭河南泛粟以濟陝截留江南浙江漕海運以濟閩雲

南山西甘肅亦小有偏災咸賑如例

十五年賑上下江二十七州縣被水饑民

是年

盛京船廠久雨江漲人給口糧一月

十六年浙東旱被災者凡五十四州縣又河溢山

東丹沁水漲入豫福建寧化清流水入城福安壽

寧風雨壞民廬舍江蘇之江浦銅山邳州沛蕭宿

遷睢寧安徽之歙績溪廣德建平銅陵壽宿山西

之鳳臺高平陝西之朝邑直隸之長垣皆以災告
常賑加賑各飭大吏加意撫輯

上尤厪念浙東

命截留漕米五十萬石

諭湖廣用倉穀碾米協濟十萬石賑糶兼施本折並賑
民用不困

十七年西安三十七州縣山西十一州縣旱民饑
飭賑如例

十八年黃淮漲淮揚徐災旋河決銅山隄宿靈虹
泗等處亦被淹

命大臣往視發帑截漕以賑饑民又撥運江西浙江湖
北湖南河南山東四川米協濟賑糶

是年山東掖濰昌邑三縣風災人給一月口糧
十九年淮揚雨下河處所復被水農民竈丁賑如
例並設廠於城粥以食餓者

是年福建漳州屬水民饑人給一月口糧臺灣澎

湖颶風壞商漁船及民田廬諸羅彰化二縣災雲
南易門石屏地震壞人民廬舍均飭大吏動倉穀

賑濟

二十年淮揚徐大水賑饑民仍設粥廠浙江杭州
湖州紹興府屬亦被水賑如例設粥廠如之

是年山東沂州秋禾災加賑有差

二十一年江南十六州縣衛山東四州縣衛水偏

災咸賑如例

二十二年

駕幸江浙

念山東災民

命加賑外各展一月因

諭曰豫省之夏邑商邱永城虞城四縣與蕭碭曹單災地犬牙相入豈獨無災此中州之民淳樸風厚不敢言災是以賑卹未及益用嘉憫著該撫卽速勘明積水地畝加賑一月又

諭河南歸德府屬之夏邑商邱虞城永城考城并陳許
兩屬各縣五六月間大雨連綿以致窪地復有積水
秋禾被淹已命侍郎襄曰修前往相度疏濬興運為
消涸但該省濱河州縣與山東之金鄉魚臺江南之
宿虹豐沛等處壤地相錯屢歲被災在山東江南者
均邀賑卹而該省地方官從前並未留心查辦獨抱
向隅今涸出補種之秋禾復被漫淹平地亦多潦浸
朕心深為憫惻雖定例夏災不賑而該處積歉之後

民食艱難應加優卹副都統三泰郎中蘇爾德現在
奉使在豫著即率同護撫劉慥查明被災戶口無論
極次貧民概予一月口糧其董率有司實心查辦毋
被胥役侵蝕中飽嗣後陸續奏報汲淇封邱中年陽
武新鄭武陟原武輝滑新鄉延津獲嘉許州長葛
祥符皆被水壞民田廬

命本折兼賑增折價撥江西湖北米協濟並以工賑疏濬
溝塍引積水達于河自十月至明年二月賑垂畢

上曰譬如赤子出慈母之懷未能強飯遽斷其乳其何以堪其再加賑一月

是年漳河暴漲注衛河山東直隸均被水發粟賑濟給銀葺居如豫省其山東濟寧金鄉魚臺鄒嶧滕六州縣淹涸者再令折賑倍給其直

是年夏兩江水甘肅雨雹山水大至民饑賑貸各如例行

二十三年甘肅河東西旱秋禾災民艱食本折兼

賑增折直河東十之三河西十之四疊

諭展賑至明年七月河州狄道環縣東樂又展賑三月
二十四年甘肅皋蘭等二十五廳州縣秋禾復災
其折賑視去年增直外再各增十之三仍分別展
賑有差

是年山西偏災賑陽曲等三十州縣貧民

二十五年江南之淮揚徐海四府州及山東湖南

甘肅州縣間有偏災咸賑如例

二十六年秋北省久雨河南河溢祥符等縣災止

勿漕

命大臣往會巡撫隨勘隨賑四鄉設粥廠便饑民之就食者直隸之大名天津山東之德州曹州皆被水截漕充賑直隸四十萬石山東十萬石

是年雲南新興州江川縣地震壞人民廬舍照例振倍給之

二十七年賑直隸四十五州縣山東甘肅各三十

州縣衛饑民

二十八年

諭曰朕恭謁

東陵途次周諮民隱直屬州縣上年秋霖被災較重深為軫念前已降諭旨加賑至今年三月但現在農民東作方興麥秋尚遠口食猶恐拮据著加恩將被災六分以上各州縣無論極貧次貧再予展賑一月其被災五分者例不應賑並格外加恩亦無論極貧次貧

民特予加賑一月以資接濟至地畝雖經涸出或無力播種者並著查明有可趕種春麥或候大田者均分別借給籽種一面辦理一面奏聞俾得無誤春畝副朕體卹愛養至意又

諭前因直屬去秋被水當此青黃不接之際猶恐拮据已降旨將被災六分以上暨被災五分者概予加賑展賑一月茲恭謁

東陵

西陵所過通州三河良鄉三州縣其成災分數皆不及應賑之例念其地近輦道上年歲事歉薄閭閻生計維艱著將通州等三州縣不應給賑村莊地方官確查實在貧民均予加賑一月該督其率屬悉心體察俾澤必下究副朕嘉惠黎元至意

二十九年廣東湖北湖南江西水賑被災各州縣饑民

是年甘肅旱蘭州鞏昌等屬災本折魚賑共糧十

八萬五千八百餘石銀四十萬九千二百七十兩
有奇

三十年甘肅皋蘭鞏昌等府屬地微震其寧遠伏
羌通渭三處情形稍重又蘭州等府屬十一處旱
咸賑如例

是年山東水加賑濟南等十五州縣糧一月又浙
江天台新昌寧海旱人給一月口糧其仁和錢塘六
縣於春耕時給籽本穀畝三升

三十一年湖南江南浙江山東陝西江西甘肅均有偏災賑如例

三十二年江南二十四縣江西十三縣湖北十三州縣水

上命於正賑外各加賑有差其浙江江山直隸懷安龍門均按成災分數賑給

三十三年直隸霸州等五十州縣廳災

命續賑摘賑加賑銀米兼放又江蘇安徽河南各屬旱

盛京承德遼陽海城廣寧及雲南各屬水均予加賑
三十四年賑兩江浙江江西湖北各屬饑民并加
賑有差其陝西直隸甘肅偏災均賑如例復以直
隸需米頗多撥通倉米六十萬石資賑

三十五年買運山東麥石解京平糶又直隸十六
州縣災

諭令加賑先後撥部庫銀一百萬兩通倉米一百三十
萬石

飭大吏妥協經理又浙江十四州縣加賑災民亦如之

又

諭直隸各屬被水應行賑卹之處著撥庫銀五十萬兩以資分給但聞銀庫舊例前經雍正年間果親王奏定凡遇應發銀兩除俸餉外俱有應扣平餘此在工程等項需用銀兩原不必悉照部法支放若地方偶有災歉特發帑銀賑卹毋許不肖官吏絲毫扣剋其事較俸餉尤重豈可於部庫撥給時分兩稍有輕減

此次所發五十萬兩著該部即於庫貯元寶如數發
往嗣後如遇賑卹之項俱照此行著為令

是年古北口山水驟發

特派大臣攜

帑銀二萬兩加倍給與災戶又以閭閻艱食

諭即開倉賑糴勿拘成例復於本月再撥內務府銀二

萬兩解往備用

三十六年直隸甘肅江蘇山東各屬災均予正賑

加賑發庫銀五十萬兩截漕撥通共八十萬石聽
直省應撥州縣領運又撥陝西藩庫銀二百萬兩
赴甘其經運米糧三十萬石尚恐不敷賑糶

飭地方大吏就近續撥

三十七年再撥部庫銀二十五萬兩通倉米十八
萬石濟直隸展賑借糶

三十八年賑河南江蘇安徽陝西甘肅各屬災民
仍各展賑其河東之大慶關等十一村莊加賑極

貧者四月次貧三月

是年山西歸化城之黑河薩拉齊之善岱等處災
人給一月口糧

三十九年直隸天津河間十六州縣災發通倉米
十萬石備災屬冬春加賑借糶又江蘇水截漕二
十萬石濟賑其安徽河南湖北山東甘肅均有偏
災加賑亦如之

四十年直隸十四州縣水安徽七州縣衛江蘇二

十八州縣衛甘肅三十一廳州縣旱於例賑外各加賑一月

四十一年賑甘肅二十九廳州縣饑民分別災重之處展賑一月江蘇安徽水均予加賑

四十二年甘肅三十二廳州縣旱賑如例以皋蘭渭源七州縣災重

特命展賑

四十三年黃河漫溢河南災截漕三十萬石并撥

鹽課銀一百六十萬兩

特簡大臣前往查辦又以安徽為豫省下游受災較重並分別加賑其出貸亳州蒙城米一萬二千石令勿追償

是年湖北漢江漲江夏等十八州縣及九衛所饑民發

帑金六十萬兩供明春加賑又江蘇之江浦六合二十六州縣衛及各場竈戶加賑亦如之

四十四年

諭亳州蒙城災重貧民照夏災例再給一月口糧復於各屬豐收處所應徵漕米內截留三萬五千石以備減價平糶

是年河南江蘇安徽甘肅災屬並加賑有差四十五年直隸水武清房山等四十一州縣災截漕三十萬石賑濟

上念被災較重之區明春尚須加賑再撥通倉米三十

萬石庫銀三十萬兩

是年山東曹縣定陶城武災所貸麥本六千七百兩有奇均豁免又加賑河南商邱考城五縣貧民兩月其餘直隸二十州縣江蘇睢寧六州縣衛安徽泗州四州縣衛甘肅皋蘭九州縣衛災民均予展賑一月

四十六年江蘇水撥藩道庫銀五十五萬兩鹽課銀五十萬兩漕米五萬石資賑又以災地較廣賑

費甚繁再撥銀六十萬兩于被災較重貧民分別
加賑

諭甘省收捐監糧之事原因邊陲地瘠民貧應令倉儲
充裕以備賑卹之用是以復經先行祇捐本色不准
折色乃開列之始即公然私收折色甚至通省大小
官員連為一氣冒賑分肥扶同捏結積成弊藪既經
敗露自不得不徹底根究現據阿桂等陸續查奏歷
年情弊俱已水落石出是竟以朕惠養黎元之政作

為官吏肥橐之資實屬愍不畏法為天理所不容况
辦賑之事朕屢有旨寧濫無遺亦欲窮民受實惠耳
若公然上下通同冒賑作弊則有濫必致有遺官吏
多一分侵漁即災民少受一分實惠朕之所以嚴行
窮究者正欲剔除官吏積弊使百姓實受賑卹之益
並非因辦賑有弊致將賑卹之事靳固不舉也前恐
各督撫誤會此意或致有災不辦曾經明發諭旨宣
示中外但恐督撫等仍未能仰體朕懷且不肖之員

或于已無可分肥即于民視如膜外其所關於民政者甚大朕如傷在抱每遇各省偏災不惜多發帑金優卹以期一夫不使失所此天下臣民所共知共見者各督撫務皆以愛民卹災使得均霑實惠為念遇有地方水旱即詳悉查勘據實奏報加意賑卹斷不可因有甘肅監糧之案遂爾因噎廢食以致稍有諱飾倘如此申誠再三而督撫等仍有蹈此者經朕察出必當重治其罪將此再行通諭中外知之

是年加賑安徽河南山東直隸甘肅湖北陝西等
屬災民各一月

四十七年黃河溢河南山東江南災

命被水各州縣于正加賑外展賑三月撥浙商佐工銀
八十萬兩漕糧八萬石濟江南以淮商公輸銀二
百萬兩漕糧三十萬石濟山東

上厯念江南豐沛等縣及山東兗曹濟各屬災甚

諭常予賑卹不必論月災退後始行停止

是年安徽二十州縣江蘇二十四州縣秋禾災賑
如例並加賑有差又加賑河南災民兩月復以豫
省河工雖已合龍而山東江蘇下游地畝甫經涸
出窮民謀食維艱

諭限至明年六月停賑

四十八年賑湖北江蘇安徽災民如例其銅山豐
縣沛縣邳州照山東例展賑五月上元句容丹徒
加賑兩月

是年陝西榆綏八州縣災散給折色大口日給銀一分小口半之

四十九年甘肅逆回滋事照乾隆四十六年撒拉爾之例傷斃者大口給銀二兩小口七錢五分燒燬房屋每間銀二兩生存人口每口先給糧一倉斗初賑不論大小口給三倉斗再普行加賑一月大口日給八合三勺小口半之又靖遠伏羌靜寧等處被賊攻圍不能自謀生計酌給一月口糧

是年江西萍鄉永寧安福湖南茶陵州攸縣水賑
如例並給銀以資修葺掩埋又黃河溢

諭地方大吏督屬攜帶錢米分途賑寧陵商邱境內災

民並分別展賑其安徽亳州被災加賑一月

五十年河南旱普賑衛輝屬五縣兩月復

命展賑三月其附近災區之延津九縣給與一月口糧

仍再展兩月至開封河南彰德府屬二十三州縣

其中有受旱較重及連年被淹積歉之區并無地

極貧下戶加賑有差先後共撥銀二百五十萬兩
漕米三十萬石供賑

是年山東安徽旱濟南各府屬三十州縣亳州等
八州縣給賑有差截漕三十五萬石濟兩省賑卹
之用又江蘇淮安五府屬旱撥漕十萬石平糶

右賑濟

恤茆獨

順治八年定給大興宛平二縣收養孤貧銀米每

名月給米三斗銀三錢每年準給六月至十年增給十月

康熙四十五年

京城廣寧門外士民公建普濟堂頒賜

御製碑文又

御書膏澤回春四字

雍正元年

諭各處養濟院所有鰥寡孤獨及殘疾無告之人有司留

心以時養膽母致失所

二年

諭京師廣寧門外向有普濟堂凡老疾無依之人每棲息於此司其事者殊為可嘉

聖祖仁皇帝曾賜額立碑以旌好義有地方之責者宜時獎勸鼓舞之但年力尚壯及游手好閒之人不得借名湊入其中長浮惰而生事端

三年

諭今冬天氣甚冷京城廣寧門外安定門外養濟院二處
將變色米賞給百石煮粥賑濟以安窮民傳諭倉場侍
郎將變色米呈驗然後賞給

十三年廣西鎮安府初設孤貧口糧四名每名歲
給銀三兩六錢遇閏加增一兩二錢其遣江縣口
糧米折銀一兩四錢一分六釐有奇桂平縣板木
銀五兩九錢六分五釐為殮葬孤貧而設均如原
編定額充補

乾隆元年

諭各省府州縣皆有養濟院以收養貧民此即古帝王
哀矜貲獨之意朕聞歸化城地方接壤邊關人烟
湊集其中多有疲癯殘疾之人無棲身之所日則乞
食街衢夜則露宿荒野甚可憫惻彼地舊有把總官
房三十餘間可以改為收養貧民之所每年於牛羊
稅內撥銀二三百兩粟米百餘石為饘粥寒衣之費
著該處同知通判簡選誠實鄉耆經理其事仍不時

稽察以杜侵蝕之弊倘地方有樂善好施者聽其捐助共成善舉但不得稍涉勉強著該都統會同該同知通判妥協辦理務令窮民均沾實惠

二年各州縣收養孤貧令保甲將本地實在孤苦無依者開明里甲年貌取隣佑保結呈報州縣官驗補其有浮於額數者亦收養院內動公項散給口糧仍入冊報銷若外來流丐送本籍收養又定四川多流寓路復險阻準其收養至七年又定凡流

寓隔省遙遠及本省相去至千里外者亦準收養
四年

諭各府州縣設立養濟院原以收養鰥寡孤獨疲癯殘
疾之窮民近聞山西陝西一帶多有老疾殘廢之人
在途行乞行旅見之惻然朕思各處既有養濟院若
有司實力奉行何至小民之困苦無依者饑寒難支
乞食於道山陝一路如此則他省與此相類者不少
矣著各省督撫各飭所屬州縣官體國家設立養濟

院之至意與朕哀此茆獨之心實力奉行毋得視為具文故事該督撫亦當時時留心訪察

六年令該管官汰除冒濫覈明收養實數分額內額外為二冊冊具里甲姓名年貌原住籍貫並注殘病孤苦實據用印結申府轉申上司官遇有開除頂補隨時申明歲終冊具支給清數報銷又定道府每歲因公所涖即帶原冊赴院點驗無弊具印結申上司官如屋宇傾圯孤貧冒濫或縱役代

領侵蝕及道府徇庇者均論如法

八年

諭曰今年天氣炎熱甚於往年聞山東山西河南陝西所屬地方民人有病暍或至傷損者該督撫等自必為之經理此等最苦之人無所依倚全在地方官善為撫卹可令各該督撫轉飭有司悉心查辦有應動存公銀兩者即行動用嗣後如有類此之事無得膜視該部遵諭速行

十五年

諭曰國家欽恤民命德洽好生至於鰥寡茆獨尤所矜憫是以定有獨子留養之例凡屬情輕俱已沾恩減等但督撫聲請之案不過尋常鬪毆之類斷不至入于情實徒使淹禁囹圄不得侍養而窮老孤孀無所倚賴深為軫惻著該部查明各犯祖父母父母現存果無次丁侍養俱以可矜減等發落著為例

二十八年令直屬州設留養局收恤老弱貧民其

外來流移貧民例無給賑者准一體入局留養

四十四年

諭京城廣寧門外普濟堂冬間貧民較多將京倉氣頭
廩底內小米撥給三百石自是歲以為常

四十九年

諭直隸大名府屬各州縣其鰥寡孤獨困苦無依者大
口日給米五合小口三合共計穀三千四百六十石
有奇

右恤艱獨

恤幼孤

康熙元年於

京師廣渠門內建育嬰堂收育棄子有姓名年月日時可稽者註於冊雇乳婦乳之有願收為子孫者亦詳其姓名里居於冊而後與至本家有訪求認領者訊與原註冊符令其歸宗

雍正二年

賜帑銀千兩

八年

賜帑銀千五百兩令置產歲收息銀以充用又撥養濟院

歲餘孤貧口糧銀二百兩於堂歸順天府察覈

是年

賜御書匾額

諭曰聞廣渠門內育嬰堂一區凡孩稚不能育養者收留

於此數十年來成立者頗衆夫養少存孤載於月令與

扶衰恤老同一善舉為世俗之所難朕心嘉悅特賜御書功深保赤匾額並白金千兩順天府尹等其宣示朕意並倡率資助使之益加鼓勵再行文各省督撫轉飭有司勸募好善之人於通都大邑人烟稠集之處若可以照京師例推而行之其於字弱恤孤之道似有裨益而凡人怵惕惻隱之心亦可感發而興起矣

乾隆六年申嚴育嬰之令各省所設育嬰堂飭有司官擇鄉之富厚誠謹者董其事官為鈎稽歲終

具收養及支存各數冊申上司官察覈

右恤幼孤

恤羈窮

京師廣寧門外普濟堂每歲

恩賜崇文門稅銀千兩撥給孤貧口糧銀二百餘兩本
堂內地租銀千餘兩為養贍孤貧之用

順治九年初設飯廠以賑貧民

京都五城城設一廠日費米二石作飯銀一兩供炊

歲十一月至明年三月終停賑

康熙二十九年增飯廠五以滿漢部院官各一人
日涖其事五廠日需米二十石銀十兩並原設五
廠均至六月終止

四十九年更定飯廠米數賑期五城設廠煮賑歲
十月朔至次年三月二十日止每廠日發米二石
銀一兩米行倉場銀行戶部支領

六十一年

諭展賑一月銀米倍給

雍正十三年

諭將存倉糶米充賑五城並各展賑一月

乾隆二年以冬月五城貧民就食者多慮有凍餒
於道者令各鋪總甲每日分巡各該管處所遇即
引赴普濟堂或棲流所晚就棲宿日出就賑春融
聽其去留

是年以漕船緯夫率多病棄道斃飭沿河各官就

近送入各州縣普濟堂或寺院量給口糧留養

三年

諭令歲米價昂貴恐小民乏食者多著設廠於九月半
舉行

四年正月增廠飯米並增設廠五

七年

諭令五城御史親至廠督賑都察院堂上官時往稽察

八年

恩賞飯廠京倉老米二百石充賑時直屬歲歉就賑者
多故有是

命

十六年五城各展賑一月都察院以閏月天寒奏
請展賑十日奉

諭改展一月

二十四年增給飯廠米日一石並增廠五城內外
以便流民之就食者又展賑南城十五日城外二

十日

二十七年以近京歲歉貧民赴廠就食者多於東壩蘆溝橋黃村清和樹村五處各增設一廠是五廠於額支米數外日加給一石簡科道滿漢各五人會同五城御史率司坊官經理

二十八年

諭煮賑各廠向年俱於三月二十日停止今歲著加恩展賑一月以示優恤

四十六年

諭五城內外粥廠展賑半月

四十七年

諭京城德勝門外功德林冬間貧民就食較普濟堂人數雖減但常例賞銀一千兩經費尚恐不敷著加恩將京倉小米賞給一百五十石以資接濟

右恤羈窮

皇朝文獻通考卷四十六

欽定四庫全書

史部

皇朝文獻通考卷四十九至

內閣中書_臣寶汝翼覆勘

總校官中書_臣孫溶

欽定四庫全書

皇朝文獻通考卷四十七

選舉考一

臣等謹按王制命鄉論秀士升之司徒曰選士由
選士三升至於司馬辨論官材論定然後官之任
官然後爵之位定然後祿之昔之后王君公所以
蒐羅俊乂量能授官蓋如此其難也書有曰萬邦
黎獻共惟帝臣惟帝時舉又曰舉能其官惟爾之

能斯蓋選舉之義所權輿矣自三代後漢稱得人
選孝秀舉賢良詔書策厲至再至三魏晉以後立
九品官人之法馴至月旦混淆世族盤據王謝崔
盧與時升降風尚之偏於斯為甚隋唐以後迺有
進士明經諸科宋元以來亦沿詞賦策論之舊至
故明末造取士則專尚文學而武備日弛論官則
爭尚浮言而實政漸墮人材枯窳選舉陵夷時則
我

太祖高皇帝

太宗文皇帝肇啟東邦廣收俊傑瑰偉英異之士應運篤
生際會風雲策勲鐘鼎八方士類莫不望風翕集
馬前俘獲立授官階帳外受降加之章服一才一
藝皆爭自濯磨以供後先奔走之用迨我

世祖章皇帝定鼎中原鄉會開科

詔求遺逸隨才器使辨別精嚴暨我

聖祖仁皇帝御極六十一年安內攘外廷臣文武各展所

長昇平日久自

內廷宿衛以至督撫外僚官司小吏或稚齒以及黃
髮或身受以及子孫銀青金紫各世其家小善必
揚片長是錄凡舉士舉官考其治行屢經集議而
釐定之我

世宗憲皇帝作興士類整飭官方韋布青衿咸登薦剡外
省士子公車上計

臨軒

面諭慎選守令親民之官大法小廉奉職維謹欽惟我

皇上承

列聖之貽謀加意旁求知人則哲澄清鑑別釐剔弊端於
局闈考試則申懷挾之禁嚴關節之防謹磨勘之
令用以養禾而去莠於選人謁選則銓除有定式
報最有年限考課有成規用以止競而去囂一切
選舉之法循名核實綱舉目張即一命至微遇有
銓補揀發亦得仰瞻

雲日入觀

彤庭蓋上自宰執六卿下逮偏陋末吏賞罰黜陟出自聖裁皆伊古立政用人之君所未嘗有者至於

推恩任子教習於幼稚之時以及吏掾出身急公叙秩或天文象緯之家或藝術岐黃之學前民利用業有專工亦得通諸仕籍各奏厥長洋洋乎洵

大聖人兼容并包之量也臣等謹據馬端臨選舉考而少為變通之首舉士次賢良方正合以孝廉次武

舉次任子我

朝無童子之科闕之次吏道次方伎又次舉官次辟
舉而終之以考課蓋大小臣工莫不有課最以辨
其勤惰優劣之數宜以是殿選舉之後也凡十門
十六卷

舉士

臣等謹按周禮以鄉三物教萬民而賓興之有六
德六行六藝之目是為舉士所肇端因是孟子有

上士中士下士之名戴記有選士俊士造士進士之辨故離疏釋麴而登王廷者皆得以士目之漢時取人多以掾吏起家以辟署任事至於舉士皆詔旨命之曰賢良方正曰孝廉曰博士弟子曰茂才曰明經則皆士也魏晉專尚門第隋唐漸用科目宋遼金元明試士之道各殊而專用文藝以決擇流品歸於一致蓋鄉舉德行而後文章意非不善而矯偽相尚易售其欺試之文藝得明敏通達

之才足以集事伊古以來名臣碩士未嘗不出於其中是以我

聖朝應運龍興尚仍其制惟是

列聖相承首端士習垂

訓誠於宮牆杜弊端於場屋其有行險僥倖希心弋獲者

懲一警百立法綦嚴我

皇上念制藝為文以代聖賢言語

欽定四書文為之正鵠

親幸貢院

賜以天章右文愛士之中示以斯文標準煌煌

鉅典實為曠古所希士生斯世而不爭自濯磨砥礪以

仰承

上旨不可為士矣臣等謹按馬端臨選舉考例列舉士

一門於卷首謹依次編集具列於篇

太祖高皇帝乙卯年

上以薦舉人才之義諭示羣臣是時我

國家肇啟東土英豪蔚起

上旁求俊哲

諭羣臣曰嘗聞古訓心貴正大予思心之所貴誠莫過於正大也卿等薦人勿曰吾謂舍親而舉疎也當不論家世擇其心術正大者薦之不拘門第視其才德優長者舉之凡為政即一才一藝之士猶為難得若有其人堪輔弼大業者急宜顯陟之耳

天聰三年

上諭曰自古國家文武並用以武功戡禍亂以文教佐太平朕今欲振興文治於生員中考取其文藝明通者優獎之以昭作人之典諸員勒府以下及滿漢蒙古家所有生員俱令考試於九月初一日命諸臣公同考校各家主母得阻撓有考中者仍以別丁償之尋考試分別優劣得二百人一等者賞緞二二等三者賞布二俱免二丁差徭嗣於八年三月考試漢人生員分別三等賞給銀兩有差

八年禮部考取通滿洲蒙古漢書文義者為舉人
取中滿洲習滿書者剛林敦多惠滿洲習漢書者
查布海恩格德漢人習滿書者宜成格漢人習漢
書者齊國儒朱燦然羅繡錦梁正太雷興馬國柱
金柱王來用蒙古習蒙古書者俄博特石岱蘇魯
木共十六人

上俱賜為舉人各

賜衣一襲免四丁宴於禮部

崇德三年

賜中式舉人羅碩等十名朝衣各一領授以品級各免人
丁四名一等秀才十五名二等秀才二十八名三
等秀才十八名各

賜紬布授品級已入部者免二丁未入部者免一丁

六年內三院大學士范文程等奏請於滿漢蒙古

內考取生員舉人

上從容諭曰忠經有云在官惟明莅事惟平立身惟清聽

不可以不聰視不可以不明清則無欲平則無曲明能正俗聰則審於事明則辨於理爾等當善體此言從公考校尋考取中式舉人滿洲鄂謨克圖蒙古杜當漢人崔光前等七人各

賜緞朝衣一領生員滿洲科爾科代等緞布有差

順治元年定舉行鄉會試年分會試定於辰戌丑未年各直省鄉試定於子午卯酉年凡舉人不係行止黜革者仍准會試

加本年直省廩生貢額併令提學官薦舉廩增附
學生員京府并直省各府州縣學廩生貢額年分
不等今正貢准改恩貢次貢准改正貢每處貢二
名止行一年後不為例有才華出衆孝弟著聞者
不拘廩增附學俱許提學官特薦試用

廷試貢生上卷以知州用上次卷以推官知縣用中
卷以通判用中次卷以州判縣丞教職用

二年定錄送鄉試科舉額數照各直省每額中舉

人一名止許取應試生儒三十名提學考試精通
三場者方准應試不得將初學之士冒濫錄送亦
不許仕宦子弟於父兄原任衙門移文起送凡在
籍恩歲貢生監生願就本省鄉試者俱許與生員
一體考送又在監肄業貢監生俱聽本監官考選
科舉若直隸貢監生內有仍赴學政及吏部考送
京府應試者通編四字號亦不許混入生員至直
省現任教職年力精強文學優長者准提學考送

應試臨場均不准改名改經其假滿病痊事結未經補考者不得錄送

定順天及各直省房考分校事宜禮部議定制科取士全繫司衡今後鄉試主考除翰林六科照例皆以次差遣臨期倍取正陪題請

欽點外其餘各衙門咨送務遴才品不得但取資次亦不得浮獵聲華順天鄉闈用中行評博及候選進士如不足取在外推知到京即送察院衙門關防局

鑰屆期會宴入簾分校各直省房考取本省科甲
屬官不足聘鄰省科甲推知及鄉科教官掛議遷
謫者不與其房數悉以各直省科舉之數為準每
房分閱三百卷或二百五十卷計數分房計房取
官必擇治行最年力強學識俱到者用之至於春
秋禮記經孤恐易揣摩臨時聽監臨官互換房分
易詩書三大經入簾次日亦聽監臨官將房考各
官單密送主考官臨分卷時照單定房以杜關節

之弊凡簾內官專主校閱簾外官專主糾察有越
俎侵事者劾之

又禮部疏請直省府州縣學生員應令各學選拔
文行兼優者大學二名小學一名送國子監肄業
聽監臣考課仍以貢監名色彙送應試從之

定鄉會試三場試題之制下禮部等衙門議嗣禮
部奏覆故明舊制考取舉人第一場時文七篇二
場論一篇表一篇判五條三場策五道今應如科

臣請減時文二篇用時文五篇於論表判外增用詩去策改用奏疏

上不準所請

命考試仍照舊例初場四書三題五經各四題士子各占一經四書主朱子集註易主程傳詩主朱子本義書主蔡傳春秋主胡安國傳禮記主陳澧集說二場論一道判五道詔誥表内科一道三場經史時務策五道鄉會試同

又禮部奏言貢生到部每年例在四月十五日

廷試昨以銓選乏人先將到部貢生隨便考試今各省咨送恩拔歲貢生三百十四名伏祈

欽定日期先行考試

命於三月十五日考試吏禮二部同翰林官赴內院閱卷

又定題差鄉試主考官日期事例禮部將應差直

省鄉試主考先後疏名上請雲南貴州四月初一

日題四川廣東廣西福建五月十二日題浙江江

西湖廣六月十三日題陝西江南六月二十三日
題河南七月十三日題山東山西七月二十日題
順天八月初四日題凡係開列具題內外簾之文
武大小各官於八月初六日黎明各備朝服行李
齊集

午門外聽候宣

旨凡點入闈之員一體謝

恩同入貢院如有一名不到禮部查叅議處各省主考官

題請後俟

命下尅期起行不許因便攜家不辭客不攜帶多人騷擾
驛遞并滋奸弊所過州縣遞相防護不遊山水不
接故人不交際一到提調官即迎入公館止許監
臨提調監試一拜考官不回答事完日方許相見
以避嫌疑其未入貢院以前所寓公館仍用考官
封條聽監察御史委官巡邏依時啟閉凡主考官
欽點後有實在患病許即日具疏辭免如在京丁憂止用

本衙門印信文書到部即將擬補官員坐名題請
其出京未遠而有憂制者度其道里時日尚可差
官更替者取所在官司印信公文火速差人赴部
投遞即與題請更代俱免自奏以致耽延時日如
行至中途聞有憂制等項題補無及者止行所在
有司轉申本省撫按代奏本官即先回籍守制其
現在一員或正或副即前赴科場併力辦理

又定鄉會試日期秋八月舉行鄉試初九日第一

場十二日第二場十五日第三場先一日點名放
進次一日交卷放出春二月舉行會試與鄉試同
三場試題俱如舊例其四書第一題用論語第二
題用中庸第三題用孟子如第一題用大學則第
二題用論語第三題用孟子策題以關切事理明
白正大不許搜尋僻事掩匿端倪必問者列款而
示使對者可按牘而陳庶乎真才可辨第一場試
題先將經書分段書籤公同拈掣如論語分為十

段主考掣得每段即令房考於本段內各擬一題
仍書籤拈掣餘題俱準此例其京闈題擬定後即
莊寫一通向

闕設案恭捧安置主考等官行一跪三叩頭禮然後
進

呈

又定內簾考官閱卷之例主考房官共坐一堂隨
分隨閱隨取隨呈去取權衡專在主考不得但憑

房考薦閱倘有執拗憤爭者即會同監臨提調指
叅

又定外簾關防四所須選精明強幹之員受卷彌
封二所關係尤重當量材受任一應書役必取土
著正身以防頂替凡卷面必印官役姓名以憑稽
考四所總門除送薪水一次外皆實封鎖不得宴
聚提調監試輪日稽察俟謄錄對讀完日方許撤
封

又定懷挾代倩之罪生儒入場細加搜檢如有懷挾片紙隻字者先於場前枷號一個月問罪發落如有倩人代試者倩代與受代之人一體枷號問罪搜檢員役知情容隱者同罪場內供應員役或有預將文字埋藏號舍及出入處所或巧為傳遞互相容隱弊竇不易發覺又有外簾官與諸生熟識者格外差送茶湯酒飯入號往來滋弊難防監臨宜嚴行禁約容隱者同罪各役宜嚴選信實司

門宜改易佐貳點名必互輪識認門內執法巡邏
廣加偵伺臨期或委能幹官二員專察諸生領卷
尋號時有在號外停立者立即扶送監臨詰問坐
定出題一切簾外員役不許私入號房傳送茶湯
其深夜受卷時監臨委官一員坐堂上嚴督受卷
官分經收卷有五十卷即時封號入箱委官一員
坐門內出必點籤稽察有卷發籤籤完必繳毋使
不完者闌出務令卷數與人數相合其大門內關

防尤宜嚴緊不許一人闌入以杜傳遞

又定取中副榜之制鄉會試卷有文理優長限於額數者取作副榜與正榜同發舉人中副榜者免其

廷試禮部即咨送吏部授職

又定試官筵宴之制會試正副主考同考執事各官二月初六日於

午門前行禮出赴禮部簪花筵宴主考同考給與綵

綴表裏出場次日行禮筵宴如前直省鄉試正副
主考同考執事等官入場日簪花筵宴主考同考
各給表裏出場次日筵宴如前

又嚴冒籍頂姓之弊凡生童有籍貫假冒姓系偽
謬者不論已未入學盡行斥革仍將廩保懲黜若
有中式者在內科道在外撫按覈實題叅革去舉
人發回原籍當差如有刑傷過犯詐偽夤緣等情依
律治罪如祖父入籍在二十年以上墳墓田宅俱

有的據取同鄉官保結方許應試已中科甲者優免戶田亦不得於祖籍近籍重疊濫免

又嚴黠緣誑騙之弊直省地方每遇鄉試年先期榜示禁約仍令巡捕員役嚴加緝訪如有生監營幹中舉及積年棍徒假稱考官親戚多方設計誑騙污累考官者照例問擬枷號滿日發烟瘴地方充軍其生監央浼營幹致被誑騙者亦照例發遣如有挾仇忌才私寫匿名紙帖揭於街衢或編就

歌謠預先傳播以致場中雖已取中不敢填榜者
在內聽巡城御史及五城兵馬司在外聽按察司
及應捕人役緝拏依律治罪見者即便燒燬主試
官亦不得以避嫌妄退文卷如生監因訟牽告在
官不係緊要對證亦許科場畢日問理毋墮奸計
以長刁風

定各直省鄉試解額順天中式一百六十八名

內直

隸生員貝字號中一百十五名北監生四字號中
四十八名宣鎮旦字號中三名遼東奉天府學夾

字號中
二名

江南省中式一百六十三名

內南監生四
字號中三十

八浙江省中式一百七名江西省中式一百十三

名湖廣省中式一百六名福建省中式一百五名

河南省中式九十四名山東省中式九十名廣東

省中式八十六名四川省中式八十四名山西省

中式七十九名陝西省中式七十九名

內寧夏丁
字號中二

名甘肅聿字
號中二名

廣西省中式六十名雲南省中式五

十四名貴州省中式四十名至八年又奏准滿洲

蒙古漢軍鄉試於順天舉人定額取中滿洲漢軍
各五十名蒙古二十名至順治九年加監生中額
十五名十一年順天加中十名江南浙江江西福
建湖廣加中七名山東山西河南陝西廣東四川
加中五名

又定磨勘試卷例前場文字以明理會心不愧先
程者為合式後場以出經入史條對詳明者為合
式各卷解到之日禮部會同禮科磨勘如決裂本

題不遵傳註引用異教影合時事摭入俚言諧語
及小結大結不分明甚至作全不可解之語者並
後場空疎五策原問十不憶五者酌量所犯重輕
察叅首嚴弊偉次簡瑕疵此外字句偶疵風簷寸
晷不妨寬貸至順治八年題准磨勘試卷內有字
句可疑者以卷數多寡分別處分考官降罰革職
十五年議准益以文理悖謬不諳禁例文體不正
等條十七年議准有雷同勦襲者黜革

又增江南鄉試中額江南鄉試舊額生員中式一百二十五名監生三十八名以南雍既裁本省在監者即與生員一體考試應增二十名至八年正月仍裁去所增之額

三年定選用會試考官例禮部議會試主考屆期禮部開列內院大學士學士六部尚書侍郎都察院堂官職名題請

簡用同考官二十員內用翰林院官十二員六科官四員

吏部司官一員禮部司官一員兵部司官一員戶
刑工三部司官每試輪用一員各該衙門推舉資
俸優深才望素著者送內院裁定入闈閱卷

增廣禮部會試中額禮部奏言

龍飛首科正士類彈冠之日今年二月會試天下舉人其
中式名額及內簾房考官均宜增廣其數以收人
才而襄盛治得

旨開科之始人文宜廣中式額數准廣至四百名房考二

十員後不為例

又定中式新進士冠服式樣金鍍銀三枝九花頂
賜一甲一名冠服照六品頂帶及諸進士鈔銀

又定新進士銓選法故明舊例進士四百名二甲
選部屬知州三甲選中行評博推官知縣不論名
次內外兼用部議開創之始法宜變通擬二甲前
五十名選部屬後二十名選中行評博三甲前十
名選中行評博十一名至二十名選知州二十一

名至七十名選推官餘選知縣庶政體人情均得其平從之

又議准再行鄉會試以收人才時大學士剛林等疏請於本年八月再行科舉來年二月再行會試以收人才其未歸地方生員舉人來投誠者亦許一體應試從之

四年定新選庶吉士分書教習時內院大學士范文程等奏言新庶吉士周啟窩等二十員應同前

金史卷之八十七
科庶吉士分別讀滿漢書命學士查布海將赫德
等一併教習

八年吏部奏言各旗子弟率多英才可備循良之
選但學校未興制科未行耳

先帝在盛京愛養人才開科已有成例今日正當舉行臣
等酌議滿洲蒙古漢軍各旗子弟有通文義者提
學御史考試取入順天府學鄉試作文一篇會試
作文一篇優者准其中式照甲第除授官職則人

知向學進取有階下禮部議定滿洲蒙古漢軍生
員開科鄉試各衙門無品筆帖式亦同生員應試
其滿洲蒙古生員筆帖式同列一榜漢軍生員筆
帖式漢生員監生同一榜俱以文字高下分別前
後至順治十四年停止康熙二年復准滿洲蒙古
漢軍生員鄉試十五年停止二十六年仍准八旗
一體鄉試

又定考核學政事宜禮部條議學政六事一學臣

報滿照例考核公明者優陞溺職者叅處一科歲
兩考完日即報部銓補新舊交代以杜署事諸弊
一學臣以到任日為始歲考限十二箇月考完所
取生童文字以純正典雅為主詭謬者本生褫革
學臣叅處一生員不許聚眾結社糾黨生事一教
官生員不遵條教違法者學臣嚴行懲究若與武
職兵丁有爭教官生員聽學臣處治不許武職擅
責武職兵丁該衙門處治不許生員結黨爭抗一

學官不宜懸缺致曠職業撫臣務按缺題請吏部銓補其有不由科貢出身濫冒教職者一併題明送部別用不得濫用雜流從之

又定各直省試差例順天江南正副主考浙江江西福建湖廣正主考差翰林官八員浙江江西福建湖廣副主考山東正主考差給事中五員山東副主考山西正副主考河南陝西正主考差光祿寺少卿一員吏禮二部司官各二員河南陝西副

主考四川廣東正副主考廣西雲南正主考差戶
兵刑工四部司官各二員廣西雲南副主考貴州
正副主考差行人二員中書評事各一員如光祿
寺乏人以戶兵刑工四部司官中書行人充副主
考後又定光祿員缺以太常太僕少卿充之皆臨
期倍取正陪以次題請

欽點順治十四年以江南既改為省仍照浙江一體題差
又禮部議定八旗科舉凡遇應考年分內院同禮

部考取滿洲生員一百二十名蒙古生員六十名
順天學政考取漢軍生員一百二十名鄉試取中
滿洲五十名蒙古二十名漢軍五十名滿洲蒙古
識漢字者繙漢字一篇不識漢字者作清字文一
篇漢軍文章篇數如漢人例會試取中滿洲二十
五名蒙古十名漢軍二十五名各衙門博士筆帖
式俱准應會試考取文字篇數與鄉試同

又禮部奏定今科順天鄉試取滿洲舉人五十名

蒙古舉人二十名主考應用滿洲內院禮部官各
一員閱卷漢軍舉人五十名聽漢主考官閱卷又
監生額數既加三十八名應增漢同考官二員至
八旗鄉試滿洲蒙古或繙譯漢文一篇或作滿文
一篇漢軍舉子試藝本年鄉試明年會試第一場
四書文二篇經藝一篇如未通經者作四書文三
篇二場論一篇三場策一道自後試藝以次加增
順治十一年鄉試十二年會試第一場四書文三

篇經藝二篇二場論一篇判五條三場策三道順
治十四年鄉試十五年會試第一場四書文三篇
經藝四篇第二場論一篇表一篇判五條三場策
五道

九年禮部議壬辰科會試

恩詔廣額取進士四百名應照會典開載南北中卷之例
南卷應取二百三十三名北卷應取一百五十三
名中卷應取一十四名從之

又內院議覆吏科給事中高辛允疏奏慎選庶常
宜參考舊例斟酌時宜擇其年貌合格文字雅醇
者充其選名數照己丑科例選漢進士四十名查
照直省大小及近日人才多寡直隸江南浙江各
取五名江西福建湖廣山東河南各取四名山西
陝西各取二名廣東取一名內拔其年青貌秀聲
音明爽者二十名習學清書餘二十名習學漢書
屆期奏請考試其滿洲進士取四名蒙古進士取

二名漢軍進士取四名俱選年貌聲音合式者同
漢進士一體讀書進館之後仍不時稽查敬肆勤
惰以為優劣用昭

朝廷作養人才之意報可

又奏准揀選舉人以會試三科為限

十一年禮部奏言會試俱有定例博士筆帖式皆
係六七品官各有職任優劣自有分別況歷科中
式舉人頗多嗣後滿洲蒙古漢軍會試止准舉人

應試其在部院等衙門博士筆帖式等不准會試庶
滿漢試例一體從之

十二年奉

諭旨設立學校原欲養育人才為將來治民之用著各提
學官察照舊例分別優劣有司教官不得徇情通賄每
有不肖之尤自知公論共棄畏罪鑽營反叨優舉或有
原非甚劣偶因別事觸犯官吏遂挾嫌主使以不檢開
送尤為可恨俱著嚴行飭禁違者事發治罪

又內三院奉

諭旨今科殿試較往年更宜虛懷詳慎一秉至公茲命爾等讀卷務體朕求賢若渴至意各官所閱試卷粘貼浮簽止書次第不必書各官姓名以除師生陋習其各擬首卷密封進覽恐九卿等官取卷好尚不同爾等仍通加詳閱期拔真才用光大典

又停選漢軍庶吉士

又奉

諭旨朕惟人臣事君勿欺為本近來進呈登科錄及鄉會
殿試等卷率多隱匿年歲以老為壯以壯為少國家開
科取士本求賢良進身之始即為虛偽將來行事可知
更有相沿陋習輕聯同宗遠託華胄異姓親屬混列刊
布俱違正道朝廷用人量才授任豈論年齒家世乎今
科進士登科錄及以後各試卷務據實供寫其餘陋風
悉行改正毋負朕崇誠信重廉恥至意

臣等謹按周制鄉大夫三年大比考其德行道藝

而興賢者能者鄉老及鄉大夫羣吏獻賢能之書
於王登於天府內史貳之此即登科錄之制所由
昉也自唐以後務浮華而少本實晉魏專重閥閱
故家敝俗相沿貴少賤老輕寒門而重世族是以
登科錄中亦復習於作偽抑知先資拜獻為臣子
事君之始而歲匿年歲且濫引宗族刊布於策名
上計時不誠不敬孰大於是甚非所以奏對

御前端乃初服之意也自是年蒙

特旨訓飭凡鄉會進

呈登科錄第敬書年齒三代而無同異姓親屬之載
於體制為更合云

又吏部奏言八旗教習貢生期滿咨部宜免其歷
事考校文義以知縣通判酌用報可

十三年內宏文院大學士覺羅巴哈納等奏言內
三院機務繁多辦事撰文各有專職嗣後撰文中
書請於額設員缺外另考取六員果能三年稱職

即送部選授主事其額設中書三十員止令辦事
於本衙門加銜久任不復送部選授至考取之法
撰文者則於舉貢內擇文理優長學問淹博者選
用辦事者則於貢監生員內擇文理平通字畫端
楷者選用庶供職得人而閣務無曠矣從之尋示
期考試吏部考取正副卷移送內院覆試錄用至
康熙六年令進士考取中書三十三年例監准貢
不准考取中書而恩拔副歲正途出身者猶循舊

例三十四年將貢生等盡停考試中書其缺專歸
進士舉人補用至滿洲貢監生員仍得考補又定
中書及部院各衙門筆帖式出缺俱令考試補授
又准平南王靖南王下考取生員各十五名舉人
各三名俱於廣東應試照漢軍例編號會試取中
進士及舉人貢監陞轉補授俱與漢軍例同

又工科給事中梁鉉奏言臣聞聖王用人立賢無
方我

皇上寤寐英才詔舉山林隱逸一時懷才應聘之士自不
乏人然採訪未確有負盛舉者亦已疊見如江南
撫臣特舉呂陽遂授監司未幾以婪贓革職又山
東巡撫特舉王運熙蒙授科員亦未有讜論建明
復以計典而去臣觀呂陽輩豈真抱匡濟之才不
過為梯榮之藉耳臣思江南及各省接踵彙進者
豈緊無人再四圖維不得不預為之慮夫山林者
何謂其遠於朝市也隱逸者何謂其異於趨競也

舉逸大興行之一時垂之千萬世必得其人乃當
其位伏祈通飭各省督撫按臣細加採訪凡地方
人才或品行邁倫或博洽經史或淹通禮樂或曉
陰陽星緯或熟山川要害或智可籌兵或才堪足
國不拘己官未官各就所長開列詳確俟起送到
日

皇上臨軒親試量能授職庶大典不致濫及為千古求賢
之盛事疏入報聞

十四年吏禮兵三部奉

諭旨我國家之興全賴治兵有法今見八旗人民崇尚文教怠於武事以披甲為畏途遂至軍旅較前迥別詳究其原皆由限年定額考取生童鄉會兩試即得升用及各部院考取博士筆帖式徒以文字由白身優擢六七品官得食俸祿未幾又陞副理事額者庫等官免從軍之役各部院衙門一事數官以致員缺居多無不樂於部用今後限年定額考取生童鄉會兩試俱著停止其

每佐領下子弟一人讀書仍遵前旨行各部院衙門員缺即以讀書子弟補用不得取用閒散人舊例官員遇恩詔及考滿俱得廕一子入監讀書如常令讀書補授文職者仍多則止尚文學不習武事其廕入國子監讀書各官子弟盡行停止令其學習武事即於武職補用自今以後送監讀書者暫行停止俟太平之日仍照舊行其蒙古漢軍及平西三藩下屬員子弟俱停其考試蒙古兩佐領出一人讀書漢軍佐領下讀書人數與滿

洲同

又奉

諭旨朕惟制科取士課吏薦賢皆屬朝廷公典原非臣子
可借以罔上行私市恩報德之地至於師生稱謂必道
業相成授受有自豈可攀援權勢無端親暱近乃陋習
相沿會試鄉試考官所取之士及殿試讀卷廷試閱卷
學道考試優等督撫按薦舉屬吏皆稱門生往往干謁
於事先徑竇百出酬謝於事後賄賂公行甚至平日全

未謀面一旦仕宦同方有上下相關之分輒妄託師生之稱或屬官借名獻媚附勢趨炎或上官恃權相迫恐喝要挾彼此圖利相煽成風朕欲大小臣工痛革積弊俱宜確守職業不許投拜門生如有犯者即以悖旨論罪薦舉各官俱照衙門體統相稱一切讀閱卷考試等項俱不許仍襲師生之號即鄉會主考同考務要會集一堂較閱試卷公同商訂惟才是求不許立分房名色如揭榜後有仍前認作師生者一併重處務令永絕朋

黨之根以昭朕激勸羣工共還蕩平至意

定寧夏等衛儒學每科鄉試另編字號額中二名

又奉

詔廷試貢生不必擬以通判用裁去上上卷名色所取上

卷以知縣用中卷以州同州判縣丞用

又奉

勅滿洲蒙古庶吉士照常錄用

又奉

諭旨國家登進才良特設科目關係甚重况京闈乃天下
觀瞻必典試各官皆矢公矢慎嚴絕弊竇遴拔真才始
不辱求賢大典今年順天鄉試發榜之後物議沸騰同
考官李振鄴等中式舉人田耜等已經審實正法其順
天鄉試中式舉人速傳來京候朕親行覆試不許遲延
規避至十五年正月

上親覆試順天舉人面

諭之曰頃因考試不公故茲親加覆閱爾等皆朕赤子其

安心各抒實學毋畏嗣以覆試之卷進

呈

欽取米漢雯等一百八十二名仍准會試蘇洪濬等八名

文理不通革去舉人

十五年禮部議覆福建道御史趙祥星疏言會試
大典別弊宜嚴第一場四書五經題目請

欽定密封送入內簾刻印頒發其二三場題目體裁既繁
仍責令主考官照例擬出得

旨第一場四書題目候朕頒發餘著考試官照例出題

又禮部奏言自元年以來會試舉人俱在

天安門外考試臣等伏思

臨軒策士大典攸關應於

太和殿前丹墀考試報可

上親覆試丁酉科江南舉人分別辦理准作舉人者七十

四名罰停會試二科者二十四名革去舉人者十

四名至十六年閏三月

上復親試罰停會試二科者八人停一科者十人餘俱准其會試

吏部奉

諭旨設科取士原為授官治民使之練習政事向例二甲授京官三甲授外官同一進士頻分內外未為得當今科進士除選取庶吉士外二甲三甲俱著除授外官遇京官有缺擇其稱職者陞補永著為例

更定科場條例一解卷遲延司府官每十日罰俸

兩月一磨勘試卷字句可疑主考同考降級罰俸
有差重者革職提問一文體不正主考分別罰俸
降革同考官降革提問有差一舉子試卷字句可
疑文體不正者俱褫革有蒙詞累句者罰停會試
二科不諳禁例者罰停會試三科一用墨筆藍筆
添改字句者主考同考及同經共閱分別降級一
取中卷內二三場同考官藍筆主考官墨筆不全
點閱者分別降罰一各考官輕率改作原墨者降

三級一硃卷應先填舉子名次後填姓名墨卷雖有姓名亦應填寫名次違者降一級墨卷錯落及違式應貼不貼者受卷官降一級本生文內筆誤一二字不礙禁例者罰停會試一科錯落題目者罰停會試二科其文內有不諳禁例字句稍涉可疑者罰停會試三科一謄寫錯落數行者謄錄對讀官罰俸一對讀向用藍筆今改用黃筆違者降一級對讀生員斥革議上從之

又定各省舉人揀選年分并貢監考試補用例舊
例舉人會試三科乃准揀選就教者不拘年分今
將遠省舉人酌議如舊其餘直隸近省舉人會試
五科方准揀選會試三科方准就教各項貢監已
考定職銜者過堂之時滿漢公閱察其年力衰老
者照授職銜例給與頂帶不必除授此外有困難
於久候情願告降者許呈明察准嗣後除歲貢照
舊外其餘貢監考職每名止取正印八人餘俱

以州縣佐貳用告降選授俱照舊例行

又定副榜考職之期內院會同吏禮二部議覆科
臣王命岳疏言恩拔選貢各途已經暫行停止惟
有功貢准貢雖為數不多亦宜停止至副榜貢應
照舊例解卷悉與中式者一體磨勘准為貢生俟
三科不第後方准考試從之

又吏部議覆科臣王命岳疏言貢途壅滯應暫停
恩拔選貢生至考取知縣宜先期點定閱卷官倍

加關防又於常試題目外量加策論一道以盡所
長從之

改宣府生員附山西鄉試中額仍照順天例

又酌減鄉會中額會試進士鄉試舉人照原額減
半以疏通選法十八年又定會試視卷數多寡臨
時定額

十六年奉

諭旨雲貴新經內附地方綏輯需人見在候選各員尚不

足用應預為徵取以備任使著於今秋再行會試

廣頒孝經衍義於學宮

命考官二場以孝經命題至康熙二十九年議准鄉會試
二場孝經論題甚少嗣後考試將性理太極圖說
通書西銘正蒙一併命題五十五年論題去孝經
專用性理

十七年四川巡撫張所志疏言蜀省鄉試中額舊
例八十四名前三科以全川未復取未及額止中

七十六名今奉有直省中額各減半之

旨適值三川俱復之後應仍照舊例減半取中四十二名
以鼓士氣章下所司議行嗣以廣西巡撫李秀請
定廣西省鄉試中額三十名經部議准亦如之

又嚴禁科場作弊禮部議覆科臣楊雍建條奏每
科鄉會試關係人才進取理宜一體慎密以絕弊
竇同考各官先取甲科若同考官作弊聽主考糾
叅若主考通同作弊京闈許監試御史糾叅外省

許各撫按糾叅其撫按所取同考官有作弊者撫
按一并治罪從之是年定會試舉人場前投遞詩
文干謁者革去舉人下刑部究擬京官不行舉首
者如之雍正元年覆准考官士子通同作弊一應
採名受賄聽情關節中式者審實將作弊之考官
并黷緣中式之舉子處斬俱立決

又雲貴總督趙廷臣疏言滇省貢院未修學臣未
到庚子科鄉試應於十八年補行從之

又內閣辦事中書舍人宮昌宗等奏求應試得

旨撰文辦事中書俱准應試即中式仍在內閣辦事不陞

別衙門其勤勞稱職者准加銜留任永著為例

又禮部議覆御史胡文學疏言直省鄉試硃卷解
到原有先後臣部及禮科隨到隨閱俱於二月會
試場前閱畢具題今科解到試卷除順天等六處
閱完外其餘陸續解到各卷隨閱送科閱完即行
具題應如臺臣所請不必拘定舊例其棍徒乘機

指詐著五城御史查明糾叅從之

十八年禮部奏會試取士原分南北中卷後因雲貴等省未經平定將中卷分入南北卷內今各處省分俱全應仍將浙江江西福建湖廣廣東五省江寧蘇松常鎮徽寧池太淮揚十一府廣德一州為南卷直隸及山東山西河南陝西四省奉天等處為北卷四川廣西雲南貴州四省廬鳳安慶三府徐滁和三州為中卷其南北中卷中式額數照

赴試舉人之數均派從之

皇朝文獻通考卷四十七